

# L'AMOUR DI TRES ARANGE

COUMÈDI EN UN ATE

**RENIÉ JOUVEAU**

PERSOUNAGE

Lou Prince  
Un Paure  
Lou Jardinié  
Lou Magician  
Tres poulidi chato

La scèno se passo dins unrode proun estrange. Au founs, uno muraio merletado coume se n'en vèi dins li vièi libre enlumina. Quand lou ridèu se duerb, i'a sus scèno un Jardinié que travaio. Intro lou Prince. Es flamamen abiba, mai es proun pousseus.

## SCENO I

**Lou Prince:** Bèu bon Diéu, que siéu las! Ai fa'cò de me metre en bousco de la chato idealo. Coume s'acò eisistavo. N'en mancavo, belèu, de bèlli chato, au païs de moun paire! Mai, quand sias fiéu de rèi, vous sèmblo que i'a rèn de proun bèu pèr vous. Em' acò fasès de couiounado. Ansin' iéu, barrule despièi sabe plus quant de tènes, à la rajo dóu soulèu, quand pourriéu èstre tranquilamen asseta à l'oumbro dis aubre dóu pargue reiau. Mai aro es un pau tard pèr ié pensa. S'au mens poudiéu saupre mounte siéu... Avise un ome. Ié vau demanda. Hou! l'ome!

**Lou Jardinié:** Moussu?

**Lou Prince:** Digas-me, vous que sias dóu païs, coume ié dison?

**Lou Jardinié:** Vous vau bèn dire, Moussu. A ges de noum.

**Lou Prince:** A ges de noum! Coume se pòu?

**Lou Jardinié:** Es bèn simple. Coume ié rèste soulet emé ma femo, avèn pas besoun de ié douna un noum. Es noste endré, pas mai. Mai, aro que me lou demandas, coumprene que n'i'aurian degu douna un. Sarié que pèr respondre à la questioun que me pausas. Es toujours enfetant de pas pousqué respondre à-n-uno questioun. Trouvas pas?

**Lou Prince:** Belèu.